



Headlines

- लैफ्टिनेंट गवर्नर मनोज सिन्हा विकसित भारत युवा नेता संवाद राश्ट्री युवा महोत्सव - 2026 तैहत जम्मू-कश्मीर दे दस्ते गी नर्मी दिल्ली दे भारत मंडपम लेई रवाना करने आहले कार्यक्रम दी वर्चुअल ढंग्गै नै प्रधानता करगंन।
- राश्ट्री मैडिकल आयोग नै श्री माता वैष्णो देवी इंस्टीच्यूट ऑफ मैडिकल साईंस गी दिती गेदी एम.बी.बी.एस दाखले आली इजाज़त गी वापस लेई लैता ऐ। विद्यार्थियें गी प्रदेश दे होरनें मैडिकल कालजें च दाखला दिता जाहग।
- मुखमंत्रि उमर अब्दुल्ला होरें जम्मू च लोक निर्माण विभाग दियें परियोजनाएं दी समीक्षा कीती। उनें बाग-ए-बाहु च डाक बंगले लेई नीह पत्थर रक्खेया।
- ग्रामीम विकास विभाग नै जम्मू-कश्मीर लेई विकसित भारत “जी राम जी” दे तैहत नमें सिरेया त्यार श्रम बजट गी मंजूरी दिती ऐ। माली बरे 2025-26 च 4 करोड़ 45 लक्ख ध्याड़ियें दे कन्नै ग्रामीण रोज़गार गी बढ़ावा मिलोग।
- जम्मू-कश्मीर दी अंडर-16 क्रिकेट टीम नै Vijay Merchant Trophy दा खिताब जिती लैता ऐ। मुखमंत्रि होरें इस उपलब्धि गी ऐतिहासिक करार दिता ऐ।



LG- Youth Festival

उपराज्यपाल मनोज सिन्हा होर अज्ज जम्मू दे कन्वेंशन सेंटर च लग्गने आहले इक समारोह च 29में राष्ट्रीय युवा उत्सव- विकसित भारत युवा नेता संवाद 2026 लेई जम्मू-कश्मीर दे दल गी रवाना करने दे समारोह दी वर्चुअल ढंगै नै सदरत करगंन। कार्यक्रम दौरान एल.जी होर युवा दल दे मिम्बरें कन्नै गल्लबात करगंन ते किट्ठै गी सम्बोधित बी करगंन। 10 कोला 12 जनवरी तगर नमीं दिल्ली दे भारत मंडपम च लग्गने आहले इस उत्सव च जम्मू-कश्मीर दा नेतृत्व करने आहले दल च 63 मिम्बर जा करदे न। इनें प्रतिभागियें गी विकसित भारत चैलेंज ट्रैक ते सांस्कृतिक ट्रैक राएं चुनेया गया ऐ। युवा सशक्तिकरण गी समर्पित एह युवा उत्सव स्वामी विवेकानंद हुंदी जयंति दे सिलसिले च मनाया जन्दा ऐ।



CM Projects (Byte)

मुख्यमंत्री उमर अब्दुल्ला होरें सार्वजनिक ढांचे गी तगड़ा बनाने दे मकसद कन्नै जम्मू दे बागे-बाहु इलाके च लोक निर्माण विभाग- पी.डब्ल्यू.डी डाक बंगले दा नीह पत्थर रक्खेया। इस सरबंधे च लोआए गेदे कार्यक्रमे च उपमुख्यमंत्री सुरिंदर चौधरी- मुख्यमंत्री हुंदे सलाहकार नासिर असलम वानी ते पी.-डब्ल्यू.डी. दे वरिष्ठ अधिकारियें बी हिस्सा लैता। इस प्रस्तावित ढांचे च भलेयां अज्जै-कल्लै दियें सुविधायें कन्नै लैस आलिशान कमरें- इक VIP कमरा- डायनिंग हॉल- रिसेप्शन एरिया- बैठकें ते मनोरंजन लेई बड्डे हाल- जिमनेज़ियम ते होर बी केंई सुविधां उपलब्ध होगंन। मुख्यमंत्री होरें प्रशासनिक ते सार्वजनिक जरूरतें गी असरदार ढंगै नै पूरा करने लेई आधुनिक ते मयारी ढांचे दी जरूरतें पर जोर पाया। मुख्यमंत्री होरें लोक निर्माण

(R&B) मैहकमे दी हर समीक्षा बैठक लाइये जारी परियोजनाएं- ढांचागत योजना ते सिडक-सम्पर्क दे खतरें च हासल प्रगति दा आंकलन कीता। मगरा- आरक्षण नीति बारे मंत्रीमंडल दी उप-समीति दी रिपोर्ट बारे मीडिया कर्मियें आसेया पुच्छे गेदे सोआलै पर प्रतिक्रिया दिंदे होई उमर होरें आखेया.

<><><><><><>

Reasi Medical –College (Byte)

राश्ट्री मेडिकल कमिशन दे मेडिकल आंकलन ते दर्जेबंदी सरबंधी बोर्ड MARB ने रियासी च स्थित श्री माता वैष्णो देवी इंस्टीच्यूट ऑफ मैडिकल ऐकसीलेंस गी दिती गेदी एम.बी.बी.एस. दाखले आली इजाजत परताई लैती ऐ। चानचक्क कीते गेदे निरीक्षण च एह गल्ल सामने आई जे इस कालेज आसेआ लोइचदे घट्टो-घट्ट मानकें दी पालमा नैई कीती जा रदी ऐ- जेहदे परैन्त एह गेंह पुट्टी गई ऐ। बोर्ड नै एह हुक्म रसाल कीता ऐ जे शैक्षणिक बरे 2025-26 लेई इस कालेज च भर्थी सबनें विद्यार्थियें गी प्रदेश दे होरनें मैडिकल कालेजें च दाखला देई दिता जाहग ते कुसै बी विद्यार्थी गी इस फैसले करी अपनी MBBS सीट नैई मुहानी पौग। बोर्ड दा एह फैसला तुरत प्रभाऽ कन्नै लागू होई गया ऐ। ध्यानजोग ऐ जे इस केहड़े कालेज च MBBS सीटें पर दाखलें गी लेइयै विवाद बी बने दा हा- जेहदे पर किश रोज पैहले अपनी प्रतिक्रिया दिंदे होई मुखमंत्री उमर अब्दुल्ला होरें आखेया हा.

<><><><><><>

Prez -Poonch Students

जम्मू-कश्मीर दे सरहदी जिले पुंछ थमां राश्ट्रीय एकता दौरै पर गेदे विद्यार्थिये कल राश्ट्रपति भवन च राश्ट्रपति द्रौपदी मुरमू होरें गी मिले। भारतीय फौज आसेया आयोजित इस टूर पर जाने आहले विद्यार्थिये गी पुंछ दे श्री कृष्ण चंदर सरकारी डिग्री कालेज थमां 3 जनवरी गी रवाना कीता हा। अजें तोड़ी एह विद्यार्थी राजधानी दिये केंई ऐतिहासिक ते राश्ट्रीय महत्वै आहली थाहरें दा दौरा करी चुके दे न- जिंदे च राश्ट्रीय युद्ध स्मारक- प्रधानमंत्री संग्रालय- राश्ट्रीय म्यूज़ियम- अमृतसर च जलिया वाला बाग ते स्वर्ण मंदर बी शामिल ऐ।



Revised Labour Budget (Byte)

ग्रामीण विकास मंत्रालय नै 2025-26 आहले माली बरे लेई जम्मू-कश्मीर गितै विकसित भारत “जी राम जी” योजना कन्नै जोड़ियै “महात्मा गांधी ग्रामीण रोजगार गरंटी कनून” तैहत जम्मू-कश्मीर लेई 4 करोड़ 45 लख ध्याड़िये दे श्रम बजट गी मंजूरी देई दिती ऐ। ध्याड़ियां बधाड़िये नमें सिरेया मंजूर कीते गेदे इस बजट दा मकसद- ध्याड़ीदारें दी बधदी मंग गी पूरा करना ऐ- टकोहदा करिये दूर-दरेड़े ते हाड़ें सवां प्रभावित ग्रामीण इलाकें च मंजूर कीते गेदे इस बजट च हाड़े सवा प्रभावित इक जहार 962 गां पंचैतें लेई 50-50 दिनें दी बाद्दू ध्याड़िये दा कम्म बी शामिल ऐ। अधिकारिये दा आखना ऐ जे नमें सिरेया मंजूर कीते गेदे इस बजट कन्नै कम्में गी लगातार जारी रखने च मदद थहोग- बेल्ले सिर उजरत दिती जाई सकोग ते विकसित भारत “जी राम जी” मिशन तैहत ग्रामीण इलाकें च कम्म-रोजगार दी गरंटी यकीनी बनोग। हाड़ प्रभावत इलाकें दे इक लाभार्थी दा इस बारे आखना हा



J&K U-16 Cricket

जम्मू-कश्मीर दे 16एं बरे शा हेठली उम्मी दे खडारियें दी अंडर-16 क्रिकेट टीम ने सूरत- गुजरात च खेड्डे गेदे फाईनल च मिज़ोरम गी इक पारी ते 182 रन्जें कन्नै हराइयै Vijay Merchant Trophy Plate Group Title दा खिताब जिती लैता ऐ। मिज़ोरम दी टीम ने अपनी पैहली पारी च छडे 100 रन्ज बनाए हे- जेहदे परते च जम्मू-कश्मीर दी टीमै 400 रन्ज बनांदे होई 300 रन्जें दी बढ़त हासल करी लैती ही। नेहा पैहली बारी ऐ जिसलै जम्मू-कश्मीर नै BCCI दा कोई बड्डा खिताब अपने नांस कीता ऐ। मुखमंत्री उमर अब्दुल्ला होरें इस उपलब्धि लेई टीम गी मुबारकबाद दिंदे होई इसी इक ऐतिहासिक जित ते जम्मू-कश्मीर च लगातार बेहतर हुंदे क्रिकेट कौशल दी झलक करार दिता ऐ।



Satish Sports (Byte)

खेड्ड मंत्री सतीश शर्मा होरें केन्द्र शासत प्रदेश च नौजवानें गी खेड्डें लेई इक शानदार मंच उपलब्ध कराने लेई बिग जे.के. प्रीमियर लीग 2025-26 दे आयोजकें दी सराहना कीती ऐ। इस खेड्ड आयोजन दे समापन समारोह गी सम्बोधित करदे होई शर्मा होरें आखेया जे सरकार नौजवानें दी खेड्ड प्रतिभा दा पता लाने- उसी नखारने ते प्रदर्शन लेई बनकदा मंच ते मौका उपलब्ध कराने लेई पूरी चाल्ली वचनेबज्झी दी ऐ ते एहदे लेई उनेंगी हर मुमकिन मौकें-मंच ते खेड्ड ढांचा उपलब्ध कराया जा रदा ऐ। उनें आखेया जे जम्मू-कश्मीर गी खेड्डें लेई इक साजगार थाहर ते इक प्रमुख केन्द्र बनाना सरकार दा लक्ष ऐ। उनें आखेया



Weather (Byte)

कश्मीर घाटी दिएं किश उच्चिएं थाहरें पर हल्की बर्फबारी होई ऐ जेदे कन्नै राती दा तापमान घट्ट होआ ऐ ते खित्ते च सीत आहली स्थिति परतिए बनी गेई ऐ। मौसम विभाग दा आखना ऐ जे घट्टोघट्ट तापमान च होर गिरावट आई सकदी ऐ ते जम्मू दे मैदानी इलाकें च धुंध पौने दे बी असार न- जेदे करी दूर तगर दिक्खने च औख होई सकदी ऐ। 15 जनवरी तगर गासै पर अद्दे-दुब्बे तौर पर बद्दल घनोए दे रौहडन। मौसम सरबंधी होर जानकारी सांझी करदे होई मौसम विभाग दे निदेशक मुख्तार अहमद होरें आखेआ

